

生生子醫案

西 13

41

共 4 册



孫君醫案序

世謂醫者意也曷以案爲然非規矩難出方員去舟筏無絲濟渡故善奕者不廢譜善陣者不釋圖豈謂譜與圖能盡奕秋孫吳之術哉意則在矣余觀司馬子長陳承祚皆古所稱良史於扁鵲倉公陶元化諸人載其所治症甚悉獨豈爲人不朽計乎夫亦欲後之人索之而知意也自是而下凡以醫知名於時者多有遺案然或傳或不傳其傳又或用或不用夫豈弋獲之虫未必灼有定見推陸之舟不無異於古今與則遺案與用案者均失其意矣新安孫君東宿以醫著名既刻有赤水玄珠醫旨緒餘諸書其子濟孺復集君所常治症以爲案余觀其書巧發而奇中用意甚精誠有得乎倉扁元化之遺借有良史如子長承祚輩其必有采焉可知也然余猶冀之人師君之意毋泥君之案庶無推舟於陸乎則君之案不獨濟

中國醫藥大學圖書館版權所有

其所已濟者矣

賜進士出身中順大夫太常寺少卿唐鶴徵撰



南京中醫藥大學圖書館版權所印

生生子醫案序

周禮姬公治書也醫方技耳而列之天官冢宰此何說哉蓋天生生者也
天能生生不能使有生者盡尊其生則生生之權於是乎窮所以斡旋生
理而佐化育所不逮者不得不寄於醫醫代天者也故炎帝也而本艸軒
岐也而靈素伊尹也而湯液皆承天好生之德而立天下萬世民物之命
顧天所以生生者惟是陰陽動靜之氣變化順逆之機燥濕虛實之宜而
長桑家生生之方皆原於是苟識不能探其玄且不能達天而惡能代天
善乎孫思邈之言曰不知易者不足以言太醫也新安有生生子又垣者
博極典籍剖生尅如列眉固已登濂洛之堂諸如柱下檀林至生脫生之
旨靡不收爲鼓吹之用以故獨觀妙竅而診治之奇駕和扁而軼其上有
聲三吳間舊矣余每見徐太史檢老輒嘖嘖生生子生生子云余竊私心

嚮往迨戊戌南還適有天幸值孫君起吳宮詹疾見其囊中光焰若發意
又有神物索之果得醫旨緒餘赤水玄珠二書展卷讀之命門右腎之辨
詳而確也十二經三焦之說暢而明也緣症投劑之方精而當也而尤精
於相火一經夫火者天以之生物人以之生身此生生之大者也論者不
翅聚訟有認陰火爲相火者矣有以五志之火爲相火者有以龍雷之火
爲相火又分天火爲相火人火爲君火者矣夫地二生火天七成之陰亦
爲主何言相也指五志則混君相其失也雜言龍雷則專肝腎其失也偏
分天人則隔君相其失也又支離決裂惟心一動而萬火奔馳心君也十
二經中包絡三焦相也君至尊居中主火之令相守位列外稟火之命所
謂君行意相行令者也經不云乎君火以名相火以位君相之名義誠千
古未發之奇也斯論出而孫君生生之意殆與火傳而不盡者乎聞其生

平臨症殫精研慮如梓人之削鑠非譽巧拙不以間如丈人之承蜩天地萬物不以易圭七之投得心應手而又隨診定方緣方立案筆之於帙以爲後日參考地彙爲六卷名歷驗醫案余方傾注一日其季君濟孺甫出示余曰此家君終身苦心也不肖兄弟將付殺青公生生之意乎天下萬世徼先生一言爲重余受而翻閱見其認症必合色脈問動止聆音聲察飲食投劑則按寒暑因虛實定君臣佐使之宜協七方十劑之妙誠可羽翼素難與緒餘玄珠並行於世亦鼎足之奇也天有生生之權而生生子代之天有生生之理而生生子洩之於以列天官何忝焉今以春秋高不能跋涉其季君濟孺甫紹明其家學於荊荆之老稚生死而骨肉緊濟孺是賴是生生之機相禪於不窮矣余雅重其人掇拾三書大旨獨詳相火之論弁於簡端以發明其生生之心云

歲在己亥

賜進士第中順大夫奉

勅整飭貴州思石道兼撫苗夷按察司按察副使路雲龍頓首序



南京中醫藥大學圖書館版權所有

刻生生子醫案序

余閱生生子醫案益知其本體圓融真機流暢功德廣運無盡無邊也何者天地以生生爲大德人含靈而參覆載者以生生爲真機脫若逐境附物障蔽靈源則德虧而機塞將人我山高聖凡海闊徒爲宇宙一餘贅焉爾文垣性成奇穎修葆精深照體獨立物我皆如往侍門牆與談名理當下悟徹透玄關妙本全彰精光昭徹以彼正覺詮契軒岐故能治靈秘於心源融素難於方寸驅彼離朱明索罔象高超名相迥出古今冲虛一念徧滿十方直可媲美和緩踵美越人又何論張季王劉彥修櫻寧輩也始鐫醫旨繼刻玄珠余謂其真發前哲之金鑰正後學之南車茲又舉生平已試之成效授之剗劂示人人而傳世世計文垣刊布豈市名高其博愛公心謂一人所濟者狹不若使人人濟之者奢也譬彼日輪高揭明晦

同光河源分逶迤邇並潤其心生生不息者將與天壤同敝乎余撫卷而

三嘆賞

郡人潘士藻去華甫譔



南京中医药大学图书馆版权所有

刻生生子孫文垣醫案序

穆叔稱三不朽曰太上立德其次立功其次立言其論固矣嘗試思之則有說焉。夔乎太上不可及也。其所謂次者豈必勛樹國家伐勒彝鼎而後謂功有能起疲癯澤蒼生卽功也。豈必典謨訓誥定保明徵而後謂言。聞理歟。覺來茲卽言也。析之二而究之一也。何也。夫底蹟之謂功舉其蹟而紀之冊功亦言也。修詞之謂言據其辭而措之行言亦功也。庸詎知功不可爲言言不可爲功乎。孔門弟子獨顏閔以善言德行稱出獨見而著醫旨輯試方面成立珠命門有圖相火有辨三焦包絡有說十二經名義無不精詳發羣賢未有之論破千古未決之疑治言述之古不爲襲舊治法酌之己不爲師心江左之顯貴隱約閭右窮檐繫惟文垣是賴此之爲功直一手一足之烈哉。所全活者多矣不可不謂之功。今茲復從諸搢紳文

學之請以歷驗之成案板之與醫旨玄珠並行於世三書言皆鑿鑿可法
謂之立言非溢美矣夫以治之奇中者成之案緣其著之論者施之亦以
得于心而見之行此非功與言合一之徵乎孫文垣氏習儒駸駸有儒望
矣以尊人病痺迺徙孔孟而肆軒岐從事之始即念業不以出乎衆爲心
曷時而能出乎衆哉衆醫衆矣吾不願從衆而卑卑執方爲也彼丈人之
承蜩若掇之者何以故專一故也於是墮肢體黜聰明解心釋神而大同
乎溟滓用能妙契素靈機洽倉扁下而張李王朱之屬靡不咀英獵華而
融會其神髓因以得于心者運之治察脈辨症輒應手而奏奇功聲名鬱
勃起吳越間矣已行功言立矣卽未能望太上之闔奧謂之尙德哉若人
非耶文垣其亦可以不朽哉余故知其心於濟人而又嘉其志於公物用
次數言以弁之首云

文林郎勿將樂事眷弟汪文璧叔圖甫譔

生生子醫案序

六



族叔生生子醫案小序

族叔生生挾靈素之祕挾其術而周遊江左治輒奇中聲稱鬱勃起吳越間揆厥由蓋臨症殫思務以己之精神通於患者之精神對病投劑匪苟然嘗試漫爲也即舉冊而筆其症脈治法以爲後之參考計積三十餘年案牘篋笥諸摺紳往往欲授梓人以公天下叔顧自視歆然不欲自炫而西吳見所潘公屢書督成之謂君昭徹理奧鎔鑄古今著論可羽翼軒岐而覺後學仁者以博愛爲公君生平仁心爲質而亟濟人布其法之已試者傳之後所濟不尤奢乎若梓工余則捐俸任之無預君也不佞燁因從旁贊之曰古人成一家言類藏之名山以托不朽叔於載籍未有之病機與衆人望之而卻走者皆得手應心起之即以天下後世爲藏室何不可者柰何經經乎持已見而重違諸薦紳之請也春秋且逾蒼河清難俟與

其徒著之冊而托之空言孰若身親見人習而見諸行事者之爲實哉叔始因余言而翻然首肯迺其二子泰來朋來欣欣色喜云此不肖兄弟子職所當盡者曷敢以瑣瑣溷潘大夫暨諸公爲用朕篋僅得十之三以付剗剗不佞獲從事校閱作而言曰嘗讀史司馬子長傳太倉令高矣第敍其察病之精而治法未詳近諸名公傳世醫文接子長之統古矣而論症與治似有差池今生生子所記歷驗之案色脈病形較若指掌緣病立方確如金右脩詞或未入二公之室迺成案則鑿鑿乎補前賢之未備爲後來之金鍼也世之從事此業者服而習之其有益於民生非渺小矣叔亦可托之不朽哉不佞次其鉅梓之由如此觀者諗之



孫氏醫案序

孫長公東宿先生早業醫名江以南邑國逢迎結轍相望長公常爲醫官緒餘數十卷懸之國門已考前言搜往牒爲赤水玄珠數百卷遞行于世醫家者便焉而長公意不但已太史公之傳倉公盧扁也于病者主名症候脈理藥物詳焉蓋其重哉由今而考之則病不必讎脈藥不必讎病方亦不必讎藥豈古今氣運之異南北風土之殊其礙戾而駭格者然乎哉不佞早業醫日治病拊脈之息以踵也吹咀之精以養也毋敢妄庸而輕自用問切則精神通病者佐使則損益準先民語功效毋能居十全語註誤毋敢措一失乃今踰耆而指使老矣概其生平而畢藉之其人可考而原其脈可按而覆其方可悉而數民命亦大矣豈嫌伐一時事不以告後人而失當世嗟乎長公之用心良勤且篤矣夫醫家上軒岐而下四氏比

之儒術六經百家其難均倍業者紛如祇事剽竊甚或師心自信倍古昔而托無能其不及于殆者幾希何所病之病不徵也病之於症卽剝變化日久與病俱而後無病病視病以用藥而后無藥藥故偃立而白首在門貌榮而却視反走彼其按圖而坐索執方而莽求其不及於殆者幾希何所病之病不習也長公故由儒徙醫軒岐四氏之書窮二酉而徹千古章櫛句比意契心通足則吾能徵之殆無間然舞象而醫手之拊人脈多于握七箸吹咀之積若丘陵然以病病者霍然已已不病病者霍然已不習無不利于長公何多耶余常從長公從子元素敘醫旨以緒餘而多其謙德乃今所籍則成案矣語有之醫者意也得意者亡法案于何有夫匠氏規矩宮室所先漁獵筌蹄魚兔是獲夫非所可案者哉關雎麟趾之意周官攸行皆此類耳是案行詎惟長公之功醫家與諸醫家之功天下者俱

不淺也不習爲吏視已成事殆謂是乎元素躍然曰余從父之覈案也不
知者以爲任德施也知者以爲博名高也知言哉生生之心爲養生主吾
子得之矣乃屬剗剗載之首簡以布海內

眷生程涓巨源父拜譔

